

Suenter in bun onn per il Corpus Catholicum

Dà 900 000 francs per la claustra da Mustér e postulà dapli paja per catechets

DA GIUSEP CAPAUL / ANR

■ **A l'entschatta dal bienni 2015–2017 ha il parlament da la baselgia chantunala grischuna, il Corpus Catholicum (oriundamein il cussegl grond catolic), mintgamai d'eleger ses nov president. Quai succeda sut l'egida dal parsura da la cumissiun administrativa, a. deputà Placi Berther, Sedrun.** Unanimamain è il vice da fin qua, *Urs Gaupp*, Vaz-sut, vegnì tscherni president. El ha immediat surpiglià il timun e ditg che tier els vegnian las sesidas entschattas mintgamai cun in'oraziun. Quella è vegnida fatga tras il vicari general regiunal, *Andreas Fuchs*, che fa era part da la cumissiun administrativa. Da noss savair è quai stà in novum e dètg significativ.

Ina buna bilantscha generala

Il rapport annual, il quint ed il preventiv èn spertamain stads liquidads. Tant il quint da quest onn sco quel da l'auter onn serran mintgamai cun in surpli tar entradas da 7,77, resp. 9,2 milliuns. Tut en tut – uschia è vegnì constatà – saja 2014/2015 stà per il Corpus Catholicum in bun, ruassaivel e benedi onn.

900 000 francs per la claustra da Mustér

Ils fats èn enconuschents: La renovaiziun urgenta da la baselgia claustrala a Mustér custa 15 milliuns. La claustra ha perquai fatg ina dumonda da sustegn al Corpus Catholicum. Quel propona da dar 900 000 francs. Quai ha il parlament dal Corpus Catholicum concedì unanimamain cun anc aschuntar che l'entir import vegnia pajà en ina giada l'onn proxim.

Pajas egualas per tuts catechets – surdà l'incarica

Deputà *Luca Tenchio*, Cuira, ha proponì che las plaivs duaian vegnir sfurzadas



(Da sen.) Luca Tenchio, president partent; avat Urban Federer, referent; Urs Gaupp, nov president.

da salarisar catechets e catechets tenor las normas fixadas da la baselgia chantunala ed uschia gular las differenzas da pajas tenor quellas dals catechets evangelics.

Quella proposta effectuescha ina lunga ed animada discussiun. D'ina vart vai per il dretg da medema paja per la medema prestaziun, scolaziun ed alur

d'excluder discriminaziuns. L'autra vart renda attent als gronds custs che sa dettitan e ch'acceptar quest postulat effectuevass che tuts engaschads da las plaivs pudessan pretender dapli paja.

La cumissiun administrativa recumonda perquai da refusar questa proposta. Mo la finala è vegnì decidì cun 42:31 vuschs e quatter abstenziuns da

surdar il postulat Tenchio al Corpus Catholicum. Uschia ha quel da preschentar ina proposta. Anc n'è dentant nagut concret decidì.

Las dumondas dad Adam a nus dad oz

Igl è usità ch'i dat tar la radunanza annuala dal Corpus Catholicum mintga-

mai in referat. Quest onn han ins envidà l'avat da Nossadunnaun, *Urban Federer*. El ha discurrì sin aut nivel davart: «Cretta u scienza? – las dumondas dad Adam, drizzadas a nus dad oz».

En in interessant exposé ha l'avat preschentà las relaziuns e pretensiuns, savens fitg cuntrastantas ed excludentas, tranter scienza e cretta, sortind da l'act da creaziun dal mund – per ils ins l'ovra da Dieu, per auters il sfratg primar (Urknall).

Las dumondas dad Adam (il carstgaun) van a nus. La tecnica saja savens in impediment per crair ed effectueschia ina ruptura tranter cretta e scienza. Il carstgaun modern dubetia perquai adina puspè. Per Dieu resti il salvament la finamira. Ils cartents sajan sin via tar lez che haja unfri ses figl per ans spendrar.

Incaricads dal Corpus Catholicum 2015–2017

Biro

Dumbravuschs: *Giovanni Brunner*, Domat; *Regula Schnüriger*, Cuira; *Albert Spescha*, Pigniu (fin uss) President: *Urs Gaupp*, Vaz-sut (nov), vicepresidente; *Marcus Caduff*, Morissen (nov); actuaara: *Maria Bühler*, Domat.

Cumissiun da gestiun

President: *Livio Zanetti*, Landquart; vicepresidente: *Sonja Gado-la-Nay*, Pignia, (novs). Commembers: *Daniel Blumenthal*, Vella (fin uss); e novs: *Martin Suenderhauf*, Cuira; *Gabriela Tomaschett-Berther*, Trun. Novs substituents: *Franz Sepp Caluori*, Cuira, e *Marcellino Flury*, Breil.


Umens sa chattan tranter els

Fundaziun da l'uniun grischuna «maenner.gr»

■ (anr/fa) **Ils 3 da november è il Di mundial dals umens. A chaschun da quel di ha lieu a Cuira in arranschament cun referats ed ordavant cun la fundaziun d'ina uniun virila.** Ils 3 da november è dapi l'onn 2000 l'uschenumà Di dals umens mundial. I sa tracta d'in di d'acziun a favur da la sanadad dals umens. La finamira da quel di è da procurar ch'ils umens daventian conscients dals privels per lur sanadad. La durada media dals umens è en Svizra var quatter onns pli bassa che quella da las dunnas. Tenor l'Uffizi federal per statistica avevan las dunnas l'onn 2014 ina durada probabla da vita dad 85,2 onns, ils umens ina dad 81 onns. Tenor Wikipedia è quella differenza en ils pajais vischins da la Svizra anc pli gronda: Qua pon far quint las dunnas da vegnir set onns pli veglias ch'ils umens.

Dapi indesch onns er en Grischun

L'onn 2004 han sin iniziativa dal psicolog e teolog *Arno Arquint* intgins umens fundà a Cuira ina gruppa dad umens. Questa gruppa «maenner.gr – ein Treffpunkt für engagierte Männer» sa chatta regularmain per discutir problems da l'um modern, ma er per giudair l'esser da cumpagnia. Per il Di mundial dals umens 2015 han decis ils commembers duas chausas: Da fundar – cun il sustegn da l'Uffizi chantunala da sanadad – in'uniun numnada «maen-



Il referent Marco Caimi è medi per umens.

FOTOS MAD



Il segund referent, Markus Theunert, presidescha l'uniun «maenner.ch».

ner.gr» e dad envidar dus referents svizzers da vegnir ils 3 da november a Cuira a referir a las 20.00 en il Calvensaal. L'enconuschent medi per umens *Marco Caimi* da Basilea vegn a referir davart «Work – Love – Balance 2.0/Männer im Arbeitsprozess: Müde Krieger und

schlaffe Tiger?». Il co-referat tegna *Markus Theunert* da Turig. El è il president da l'uniun «männer.ch», l'organisaziun tetgala da la maenner.gr. Theunert è stà l'emprim incumbensà per umens da la Svizra. Tenor ils organisaturs vegnan tematisadas quella sai-

ra la sanadad, la repartiziun da las rollas tranter umens e dunnas ed auter pli. Ordavant, gia a las 18.30, ha lieu en la sala Chalavaina la fundaziun da l'uniun maenner.gr. Quai vegn ad esser l'otgavla secziun da l'uniun tetgala männer.ch.

Sa confrontar cun l'esser um

«maenner.gr» consista actualmain da duas gruppas activas. La gruppa centrala è il cor da l'uniun. Ella sa chatta ina giada al mais per meditar, discutir, rir e schizunt er mintgatant cridar. Durant l'onn vegnan purschidas er activitads sco p. ex. il Di dals babs. Da quellas pon prender part er auters umens interessads. Tut ils commembers da la gruppa centrala fan part era da l'uniun. La gruppa dals principiants è ina purschida publica da l'uniun: Ella ha lieu actualmain mintga segund onn. Cun ella vul l'uniun maenner.gr envidar umens da sa confrontar cun la rolla da l'um. Durant set sairas vegnan prendids en egl differents temas da la vita virila. Temas en p. ex. far patrats davart la relaziun cun l'agen bab, l'amicizia tranter umens, acceptar la partenaria sco eguala, la dimensiun cumplexiva da la sexualitad, scuvrir la vart paternala en sai e colliar tschiel e terra.

La sairada da maenner.gr ils 3 da november 2015 en il Calvensaal, Ottostrasse 24, a Cuira cumenza a las 20.00. Interessads en envidas er a la fundaziun da l'uniun che ha lieu en quella sala gia a las 18.30.